

湖北金石志

金石志十四

元

長春道院四大字

存正書在  
荆門州

長春道院

至元十七年庚辰歲開山口真會陽子和

下缺

泰定元年上元甲子重建大殿功德主李友信偕室朱氏

當代徒弟

下缺

馬案右碣題長春道院四大字院字剝落不全字徑一尺

前題泰定元年上元甲子重建正殿功德主李友信偕室

朱氏當代徒弟

下缺

後題至正十七年庚辰歲開山口真會

陽子

下缺

高四尺七寸寬一尺九寸在荆門州城玄妙觀觀

卽長春院之遺址也按州志云宋爲荆岑偉觀端平中兵

毀元道士邱長春鍊丹於此得名今丹井尙存湖北金石詩注核

碑尙存本作至元金有詩注作至元誤

煙霞井泰定題名

有正書  
在麻城

大元泰定丙寅歲徵仕郎麻城縣達魯花赤□守官馬彥□

劉宜之□

泰定題名在井左金石存  
佚考

夫子石刻象記

存正書  
在黃梅

癸亥仲春沔陽景陵簿靳良叔以公務抵江陵游玄妙觀觀  
唐吳道子圖形磚筆勁而古貌恭而安摩挲審視知爲先聖

燕居之像詢其由黃冠曰近有當道羅封者過水梁馬嘶伏  
不進鞭策數四逾退卻命隸視之報梁石有像遂致於此靳  
歸以告僚屬幕佐陶景山力請移文取置江陵崇文閣任回  
打碑像以歸越四歲丙寅秋予寓梅庠陶君言事之本末甚  
悉一日于李和甫家塾得其像呈令尹景山李君躍然以喜  
而感亦隨之曰仲尼日月也孰得而踰焉吳生神筆也千載  
陸沈復見今日仰先聖之靈昭昭赫赫遺像所在自有神物  
守護而焉呵隋文鎮石之語亦固甚矣于是捐俸錢命工勒  
像于石俾人人瞻仰乎申申天天之容如獲親炙之者焉噫  
盛哉周宣岐陽石鼓復見于鳳翔之宣廟餘慶之力也今景  
山勒石之心餘慶之心也澔謹序其事而爲之記

按先聖畫像自漢以來有之若賴鄉孔子像及劉宋陸探

微梁張僧繇等所畫胥傳於世至孔廟則水經注云廟有  
夫子像列二弟子執卷立侍穆穆有恂抑之容是也原像  
所由起本於祭之有尸郊特牲曰尸神象也蓋以神道事  
之則立主以人道事之則立尸國語越王句踐因范蠡游  
五湖以良金鑄其像而朝禮之亦推此意爾唐宋至明初  
太學及郡縣學皆塑像以祀先聖至嘉靖九年張璁始緣  
帝意言孔子祀宜用木立其塑像宜毀雖著爲令甲而直  
省州縣仍有像設主並設者或乃以像設起於釋氏亦可  
謂知其末而不知其本者矣

金石考  
佚考

夫子石刻象記陳澐撰泰定三年在黃梅縣學大成殿先  
師神主後壁校王文簡皇華紀聞載白鹿洞禮聖殿有陳  
澐所撰像記豈黃梅爲重摹者與然記言聖像得自江陵

而可大又於梅庠悉其本末則收入湖北金石中固其宜

矣

嘉慶通志

紀光普照寺鐘銘

在隨州

維漢之東峩峩梵宮開元之宗佛法流通彼美鴻鐘碩音孔  
容堅木斯攻德音無窮鯨韻載椎聲徹九重普照溶溶義山  
崇崇用祈歲豐以振禪風鳴贊時雍聖壽天同 魯正卿作  
隨州之南古有伽藍東牆綠水西空寒山刹竺淨境螺唄幽  
壇晨夕二節無推僧□舒吾隻手法侶方嬾嗃霜時泰應鐸  
祝遷佛光永煜聖壽常安乃留後軌智者窺看 本山住持  
釋洪梁號義山自造 泰定四年十一月日

馬案右元報恩天<sub>監</sub>禪寺鐘高四尺八寸圍一丈四尺雙

龍紐界四面一面題泰定四年十一月日系銘二各十六  
句每六十四字前銘魯正卿作後銘不書名一面書真言  
七則一面列施財擅越名目一面列各職事僧名及本寺  
徒弟法名而已在隨州城南里許報恩寺內

湖北金石詩注

紀光普照寺鐘銘在隨州南報恩寺泰定四年十一月鐘  
文分四面一面書滅業障滅罪破地獄往生消災長福德  
除萬病七種真言一面書捨財擅越名目隨州有土橋村  
白泥係八里店東廊村等地名應山縣有浪河村小屯平  
港兩仙山馬平村西山白虎港等地名可證古今土地名  
同異一面書本寺徒弟眾有知事提點直歲上庫下庫倉頭  
知賓殿主沖頭等名色一面則魯正卿與住持僧洪梁所  
作鐘銘也

金石存佚考

寶林寺鐘

存正書陽  
文在隨州

應山縣仁義鄉天井淵龍興寺伏承信士鄒貴明謹發成心  
鈔化寶林寺住持洪緣宣受仁慈廣福大師善□□□庵古  
佛正明

天歷元年十月日匠人喻子德

馬松右鐘高三尺四寸圍六尺六寸一面題應山縣仁義  
鄉天井淵龍興寺伏承信士鄒貴明謹發成心鈔化云云  
一面題寶林寺住持洪緣宣受仁慈廣福大師善□□□  
庵古佛正明末行題天歷元年十月日匠人喻子德而已  
其二面無字在應山縣城北二十里寶林寺內

湖北金石詩注

敕賜漢陽大別山禹廟碑

未見韓金石  
存佚考錄入

翰林學士承旨正奉大夫知制誥兼修國史臣閻復

□

翰林學士中順大夫知制誥同修國史臣林元奉敕  
撰文

中議大夫參議中書省事臣許有壬書丹

正議大夫前嶺南廣西道肅政廉訪使臣奧屯忽都  
祿篆額

大德八年冬十有一月中書省奏湖廣行省言昔禹治水有  
功舊立廟於大別江濱久廢重建乞賜廟碑以崇明祀制曰  
可命翰林述其事欽惟聖朝混一海宇天下名山大川古帝  
先王有功德於民者莫不秩祀稽諸祭法能禦大菑則祀之

能捍大患則祀之且載禹能修鯀之功其治洪水豈非捍禦  
菑患之大者歟故舜稱之曰地平天成六府三事允治萬世  
永賴時乃功則廟而祀之宜也荊州之域江漢爲重漢鄂之  
山大別爲表禹乘四載隨山刊木導水至于大別西則岷蜀  
襄沔之眾流聚焉南則衡湘洞庭之巨漫匯焉疏鑿排決亦  
云勞矣至於江潁兩磯對峙順流東注朝貢舟航浮於海入  
於淮逾于河達于帝都此其故也曩歲我世祖皇帝六飛南  
巡渡江次鄂駐蹕於黃鵠山時大別形勝正當瞻覽嘗問父  
老曰山頭石磯何名呂公對曰聞唐時有道人呂姓者吹笛  
其上又問唐前何名不能對再三問有對曰聞諸古語云是  
禹功字音譌傳大稱聖意嘉獎久之蓋以拯溺平水之功默  
契於拯民水火之心也今上皇帝嗣承丕緒孝思祖武以鵠

山乃黃屋臨御之地詔就歷雲亭故址創建大元興寺闡世尊慈悲之旨以演世祖慈仁之恩中書石丞相哈剌孫荅刺罕時以平章政事開省湖廣承制鼎建不擾而辦丞相又以鵠山大別夾江屏蔽爲鄂漢唇齒重勢皆世祖親見而留念者漢陽嘗撥置江北奏請仍隸湖廣就大別禹廟舊基經營締構以寄禹功之思今告落成非常祠所可同語欽想先帝神遊風馬雲車之所至一統阜康百神受職誠足以慰在天之靈也然公朝許樹豐碑者豈徒侈金石之觀而已哉思昔天王使劉定公勞趙孟於洛汭劉子曰美哉禹功明德遠矣微禹吾其魚乎吾與子弁冕端委以治民臨諸侯禹之力也盍亦遠績禹功而大庇民乎今之江漢猶河洛也岳牧可無繼績之思乎禹亦有言德惟善政政在養民水火金木土

穀惟修正德利用厚生惟和九敘惟歌勸之勿壞意謂水土  
既平之後天下國家之治常修和而勿至於壞俾政得其敘  
德可以歌而人有勸則善也盡力千載之上垂念萬世之下  
其用心果何如哉是心也卽世祖燕翼貽謀之心也於是作  
迎神頌功降福之章使典禮者歲時歌而祀之以揚聖天子  
之嘉命其一曰新廟翼翼兮漢水之陽題榜翬飛兮昭宣寵  
光霓旌來下兮神明洋洋臣圭黻冕兮德冠百王來世瞻仰  
兮何時弭忘其二曰濬川隨山兮大別堂堂乘載泣止兮朕  
胝度荒拯民昏墊兮功參彼倉皇武六龍兮江漢是航念此  
疏鑿兮心包混茫不有清問兮禹功曷彰民而思禹兮其思  
世皇其三曰天下一統兮今歸聖皇九州耕桑兮暨於荆揚  
禹貢穰穰兮悉登職方山川神氣兮若時雨暘萬世永賴兮

斯言允臧崇德報功今紀於太常籙豆薦嘉兮歌此樂章神之格思兮降福無疆

禹功在天地亘萬世不壞大別表表有廟立焉大德間平章答剌罕重修請碑於朝詞臣有文而其碑未立至順癸酉知府梁彥義等得其文民間始買石以刻屬臣有壬書有壬頓首伏讀獲覩始末書不敢辭而但未悉其未立之故彥義等訪之耆舊莫得其說索之掌故歲久無徵且禹功童穉所知祠宇旣設碑特一簣況奏請出中書而文實奉詔筆也因循乃爾廢格孰甚焉豈廟之修皆答剌罕旣入朝繼者不遑以至於是邪是亦有司之過也大德八年距今三十年凡厯幾政無一人及之者彥義乃能舉於已墜知爲政已抑廟與碑於禹何有而我國家拳拳於是者所以思禹功在養民之意

深矣於戲列聖功德纘服有加焉臣有壬旣書之且記其槩庶繼者知承流之重而一事之成不易若是則凡可以舉於未墜者可不勉乎是歲九月臣有壬頓首謹書

馬案右碑題敕賜漢陽大別山禹廟碑第二行翰林學士承旨正奉大夫知制誥兼修國史臣閻復口翰林學士中順大夫知制誥同修國史臣林元奉

下缺

第三行中議大夫

參議中書省事臣許有壬

下缺

第四行正議大口前嶺南廣

西道肅政廉訪使臣奧屯忽都祿

下缺

文十六行行五十九

字文後又迎神頌三章章十句十四句十六句碑云大德八年十一月中書省奏湖廣行省言昔禹治水有功舊立廟於大別江濱久廢重建乞賜廟碑制曰可命翰林譔文紀禹之功以樹豐碑云云頌後又有許有壬記云大德間

平章答刺罕重修請碑詞臣有文而其碑未立至順癸酉  
知府梁彥義等得其文屬臣有壬書又云大德八年距今  
三十年凡歷幾政無一人及之者彥義等乃能舉於已墜  
臣有壬旣書之記其概則凡可以舉於未墜者可不勉乎  
於是歲九月臣有壬頓首謹書云云行書校元史傳云許  
有壬字可用其先居潁後徙湯陰延祐二年進士第授同  
知遼州事至順二年召參議中書省事善筆札工詞翰今  
閱其記與書史稱不謬碑連額高六尺四寸寬三尺三寸  
額篆大禹廟碑四字兩旁盤龍碑左上別有一圓空考古  
碑以麗牲又以引葬施轆轤故碑中有空如孔宙碑是其  
遺制茲在上莫知其義碑在漢陽縣城東大別山晴川閣

碑在大別山麓晴川閣以大德八年撰文後三十年書丹  
刻石順帝以是年十月改元元統此在九月故跋云至順  
癸酉也

金石存  
佚考

### 重刻羊公碑陰跋

佚據圭齋  
集錄入

右晉太傅羊公碑重刻善本襄陽鎮帥楊君廷臣洎郡侯呂  
君蒙甫屢登峴山追懷叔子盛德慨念古所謂墮淚碑今不  
可復見楊君之宗人志卿稔聞王君君實家多先代碑帖暇  
日相過語及羊公碑君實適有本欣然以授志卿時宣文閣  
監書博士周君伯溫號曉古人書法尤精臨摹志卿以屬之  
乃構得□山貞珉又得善工刻之崇真宮車載至潞上是舟  
涉濟達江淮及漢復樹之峴首京師大夫士相傳以爲盛舉

按羊公故碑漫滅梁大同唐大中宋景祐重鐫者三證以吾宗文忠公生於襄鄧間蹤跡最密其自夷陵令遷乾德正景祐過峴山讀蕭誠書內所選獨孤冊碑愛之收入集中不應遺羊公碑而獨取此意者景祐新刻斯時尚未備也景祐乃晏肅所作肅有創物之智爲之必精第恐歐公未之見耳此本學書之古疑爲梁刻昔羊公游峴謂從事中郎鄒湛等曰自有宇宙便有此山古來賢達勝士登此遠望如我與卿者多矣皆湮沒無聞令人悲傷如百歲後魂魄有知猶應登此湛曰公德冠四海令聞令望必與此山俱傳由昔距今幾及千載元車書混同文治日盛好古君子萃於輦轂於是典午遺文南城遺烈復傳不朽豈無數存乎其間哉使公魂魄過峴候見故碑圖不追憶湛言而德諸君之懷賢益信夫秉彝

好德雖百世猶一日也

宋景祐間晏肅重書羊公碑至元又毀宣文閣監書博士周伯琦以梁本摹刻襄陽鎮帥楊廷臣重立歐陽元撰陰具載其事

金石存佚考

善公行實碑

存正書在天門

善公六實山碑

額篆書

敕賜寶林禪寺重開山住持仁慈廣福大師善公行實之碑

榮祿大夫大司徒大都大承天大護聖寺住持印吉祥撰

朝請大夫山北遼東道肅政廉訪使章同昇篆額

奉議大夫前德慶路總管府判官陳誠德書丹

夫我釋迦文佛三界大師四生慈父是以未離兜率已降王宮未出母胎度人已竟可謂佛真法身豈有去來應物現形本無名相巍巍乎而無與等蕩蕩乎而不可□□無德而稱者是謂大覺歟世尊自降靈於周代協夢於漢朝大教西□□風東被所以菩提達摩遊梁涉魏燈燈續燄祖祖聯芳自唐迄紹興間祖之梵刹其淮漢□社□寶林□之二三耳金宋之後灰燼何存豺狼所居荒蕪百載歲久奚爲

洪惟

皇元之有天下道齊佛日之光列聖之大願大力敕遐邇大興於梵刹擁護佛乘天威神縱於山林崑谷凡有古刹俾僧復興其寶林幽野久廢之數孰能爲乎哉師諱善乃常德路

龍陽州劉氏之子也父劉萬廣母于氏師於齟齬之□與童輩不羣志樂出家父母不能奪其志時舍送於本路林蔭觀禮唐邵觀爲師爲道童至乙亥年天下太平一統師於至元丁丑春雲遊迤北諸方習業寓汝州香山學誦華嚴至心佛與眾生是三無差別乃掩卷而喟然嘆曰佛之教乘果有如此欣然棄簪歸於釋氏焉遂禮汝州風穴禪寺住持一庵長老爲師薙髮參侍巾瓶歲餘至元己卯遊於汴京之孝嚴而受具師之性樂於中水已卯尋於信陽州之山塘結茅於青絲礪值歲旱士俗請祈禱俱有感應悉皆歸向焉未幾一庵老師風穴退席於至元庚辰春首來隨之山卽至元十七年也比及一庵老師未至師已先至與隆師伯共入荆棘撥草而尋寶林故基師之性猶不願於此廣收棗栗而登黃連□

頂之北北之有古松師又結茅於松之下兀然而坐終日不動但以漿粟充飢以爲樂在其中矣卽於庚辰眾請一庵老師開山住持寶林辛巳春令人喚師下山來寶林老師云普善汝休離吾左右吾之所居創□□□哉師固不敢辭遂翦荆榛而盡力負荷開田安眾而□之法堂東廚刈茅而創之規模頗整奈其力而莫加焉於丁亥至元二十四年冬一庵老師圓寂老師存日曾囑云吾歲後院事一者荒涼二者□糧無眾汝曹孰能維持眾皆不能對老師云汝等且致吾觀普善將來有豈癡福一庵圓寂後眾皆推舉之師不忘付囑而主之古有贈寺田土雖然寬闊遂旋開耕所收子□修營安眾又於至元己丑秋信陽之觀音院主圓寂就請師主之自此兩處往來住持爲眾竭力凡所院務師皆親臨不辭

勞倦平生不畜衣資不擇寮□不臥新鮮牀席於眾所須之物悉皆讓之於□貪愛而苦己利他師行之足不躡履坐則禪寂不避寒暑倘遇歲儉飢民往來師罄其所以而濟之終無恪乎常歎云齋僧當耳其飢民吾不濟者誰可謂師之平生性寬德厚蕩蕩乎人莫能比哉精神老之彌篤後於戊午延祐季冬欽授聖旨護持寶林觀音兩處住持授與仁慈廣福大師之號蓋爲師之悲力故感如是乎寅昏專以焚修爲務報佛恩德又於乙亥元統□□□聖旨護持一新應山寶林信陽觀音兩處道場仍舊命師主之後於當年十一月二十六日師微疾告終壽七十有六僧臘五十有一荼毘靈骨三處□□一祖塔二東山三信陽門□□十有餘其時門人深緣在門元宗攝所知事持書就彼哀之時深嗟師恩難報

徑赴都丙子春首詣於皇元□□□□□榮祿大夫大  
司徒座下求文未審容否到彼一日大師於方丈內坐未敢  
容易次日達知敬投座下炷香再拜云洪緣本師善公新圓  
寂□□已竟特來拜求司徒太師請文刻之貞珉卽袖出善  
公行實一紙司徒曰汝之師余令郾城之紫岡開演吾嘗識  
之其貌堂堂其福洋洋住持之名飫之久矣吾今微疾豈能  
爲之讚述何及然雖鄉梓奈於病何再三固不敢辭而爲銘  
銘曰

仁慈太師

德廣福彌

寶林觀音

兩處住持

創修古剎

道力相資

翦除荆棘

揭石開基

堂殿勝跡

森然□□

山林幽邃

材木有餘

刈茅蓋覆

與眾同居

不辭勞苦

躬之開畬

旋置牛隻

招募田夫

頗收子粒

給眾安歇

年深歲久

積之廊廡

細素□□

德之不孤

住持兩處

猶懷結廬

幼年苦行

絕後重甦

這箇消息

誰知樂乎

師之解脫

不畜衣盂

焚修爲務

數處覲模

次第成就

願力相□

苦盡甘來

鐵樹花開

無心合道

諸聖安排

戊午延祐

悲怨常存

欽授聖旨

擁護佛門

兩處梵刹

大轉法輪

門之昌盛

修慧修文

乙亥元統

復授王寵

大張祖風

紹隆佛種

師之壽臘

七旬有六

厭世告辭

不須付囑

吾之不貪

以少爲足

言訖而逝

現成王昧

亘古亘今

以何爲最

□□□□

嘉聲不墜

欲報師恩

德無疎親

樹石於庭

萬古常新

至元二年十二月十五日

中奉大夫管領順德大開元一宗諸路都宗攝圓照普  
門光顯大禪師益吉祥

馬案右碑題敕賜

缺

寺重開山住持仁慈廣福大師善公

行實之碑又行上

缺

大夫大司徒大都大承天大護聖壽

住持印吉祥撰文行奉議大夫山北

缺

道肅政廉訪使章

同昇篆額又行奉議大夫前

缺

路總管府判官陳誠德書

丹後題至元二年十二月十五日末行題中奉大夫管領

順德大開元一宗諸路都宗攝圓照普門光顯大禪師益

口吉祥額橫書善公行實之碑六篆字石高六尺四寸寬

三尺三寸在應山縣北寶林寺內

湖北金石詩注

臣下碑

存正書  
正均州

長生天氣力裏大福廕護助裏皇帝聖旨軍官每根底軍人  
每根底城子裏達魯花赤官人每根底來往的使臣每根底  
宣諭的聖旨成吉思皇帝窩闊台皇帝薛禪皇帝完澤篤皇  
帝曲律皇帝普顏篤皇帝格堅皇帝札牙篤皇帝亦璘眞班  
聖旨裏和尚也里可溫先生答失蠻不揀甚麼差發休當者  
與告天祈福者道有依著在先聖旨體例裏不揀甚麼差發  
休當告天與咱每祈福祝壽者麼道襄陽路均州有的福地  
武當山大五龍靈應萬壽宮裏有的甲乙住持主領官事兼  
領本路諸宮觀事教門高士崇元冲遠法師邵明庚住持提  
點教門高士通因靈應明德法師李明良爲頭兒先生每根

底執把行的聖旨與了也這的每宮觀裏房舍裏他每的使  
臣休安下者舖馬祇應休掣者商稅地稅休與者但屬這宮  
觀裏的莊佃田地水口磨口典庫店舖席浴堂船隻竹葦醋  
麵等不揀甚麼磨差發休要者更這蒿口蒿坪梅溪雙谷白浪  
平堰等處村子裏有口口口地水土不揀甚麼物件不似是  
誰休倚氣力者休奪要者更這先生每有聖旨麼道無體例  
的句當做阿它每更不怕那口口口口口口至元三年牛兒  
年三月二十日大都有時分寫來

臣下碑正書至元三年三月在均州五龍宮碑用蒙古語  
而以漢字譯之與石墨鐫華所載蓋匡縣重陽萬壽宮碑  
及山東考古錄所載嶽廟碑體式一同成吉斯太祖尊號  
今譯青吉斯臥闕台史作窩闕台太宗名今譯諤格德依

上也薛禪世祖尊號今譯色辰聰明也完者都史作完澤  
篤成宗廟號今譯諤勒哲圖有壽也曲律武宗廟號今譯  
庫魯克超眾之謂也普顏篤仁宗廟號今譯布延圖布延  
福也圖有也傑堅史作格堅英宗廟號今譯格根明也忽  
都篤史作護都篤明宗廟號今譯胡土克圖再來人也札  
牙篤文宗廟號今譯濟雅圖濟雅天命之命也圖有也亦  
憐真班史作懿璘質班圖宗名今譯伊埒哲伯伊埒明顯  
也哲伯梅針箭也也里可溫今譯伊嚕勒福分也昆人也  
答失蠻今譯達實密唐古特語達實吉祥也密人也金石存佚  
考

大五龍靈應萬壽宮碑

存正書

在均州

至元二年歲在丙子武當山大五龍靈應萬壽宮武當殿成  
國教大宗師特進上卿總攝江淮荆襄等處道教吳全節爲  
集賢院言翼軫之墟襄漢均房之間有山兮根盤八百里峰  
之高者七十有二巖之幽者三十有六澗之深者二十有四  
天垂地接陽鑒陰喻不可名狀名曰太和之山國武神得道  
其中改號武當謂非國武不足當此山也山多神宮仙館其  
大者有三曰五龍紫霄真慶而五龍居其首貞觀中均州守  
姚簡禱雨是山五龍見卽其地建五龍祠宋眞宗時陞祠五  
龍觀賜額曰五龍靈應之觀其後廢於靖康之禍孫眞人元  
政興之又廢於金烏珠之兵皇元受命與天地合德大興老  
氏之教扶運異世以迎休祥山之有道之士汪思眞奮然特  
起辟草萊翦菑孽悉舉而新之先大宗師上卿張留孫初總

攝江淮荆襄道教奏以其山葉希眞朝覲天子大信其道至  
元二十三年詔改其觀爲五龍靈應宮以希眞主之居八年  
而侯道懋繼之又二十年而續道成繼之仁宗皇帝天壽節  
實與[玄]武神同遂加賜其額曰大五龍靈應萬壽宮仍甲乙  
住持歲遣使以是日建金錄醮祝釐其山自是累朝歲遇天  
壽節一如故事此後大建[玄]武殿宜得詞臣文而勒之石以  
彰國家之美以重此山明年三年二日集賢以聞詔以命臣  
俟斯臣俟斯竊謂名山大川能出雲雨以澤萬物產財用以  
利萬民毓英賢以輔萬世必宅天地之奧當陰陽之會磅礴  
融液與大化終始故終必有神出幽入冥此感彼應如風之  
在谷所觸皆通水之在地無往不達況此山葆乎中和統乎  
陰陽應變合行與神俱藏羣山四朝而特起乎中央非[玄]武

焉足以當之則其宮室之崇享祀之嚴應國家之運爲生民  
之依者固有在矣殿之建[玄]教大宗師臣全節實出私錢萬  
緡爲之倡而住山續道成張道真吳明復邵明庾李明良先  
後贊而成之其屋壯麗巖峻洞達高廣蓋與茲山相雄世所  
稱神仙曰殷長生房長賢馬明生田襄衣之徒皆成道於此  
是以論人傑必本於地靈也其辭曰虛危之精[玄]武君上臨  
[玄]天貴且尊穹龜最屈騰蛇蜿手指北斗酌乾坤武當之上  
號太和神君居之降百魔五龍守衛嚴不訶冷氣自少元氣  
多神君生在天地先谷神自養天地根二十四氣如環旋七  
十二候無頗偏四十二載昇[玄]天[玄]天之樂不可言身著[玄]  
衣坐紫府蒼龍在左右白虎朱方翼翼朱鳥舉騰精攝景我  
爲主百靈守之誰敢侮或按長劍坐橫庭吐納日月含風霆

五龍冉冉隨降昇倏而去之若流星忽而來兮雨冥冥鬼車  
九頭市火屋山鬼倚樹惟一足飛蝗蔽天食百穀長蛟鼓浪  
沈平陸神君一顧赤爾族神君自居武當山人能學之盡得  
仙前有殷房後馬田陳搏尹軌相攀援新開大殿凌紫煙璿  
題藻井相鉤連神君居之樂無邊保我聖<sub>麻</sub>億萬年

大五龍靈應萬壽宮碑揭侯斯撰至元三年三月在武當

山金石存  
佚考

興國錄事翟承事棠愛碑亭記

未見

興國錄事翟承事棠愛碑亭記林南翔撰文夏日攷書王

章篆額至元三年十一月在興國小西門外關廟

嘉慶志

景陵重修儒學記

存正書  
在天門

景陵重修儒學記

湖廣等處行中書省進士景坤厚撰

承務郎武昌路通城縣達魯花兼勸農事完迨帖穆  
書丹

朝列大夫沔陽府知府兼勸事安禮篆額

學制與王制均盛衰是故學制備然後王道得理勢相須此  
其驗與三代盛時王宮國都閭巷各有學王公以下及庶人  
子弟皆鋪禮樂而陶詩書逮至成康刑措不式道化之入人  
深也如是哉然則士之生斯世者抑何幸耶王道之易易從  
可知已春秋叔世學校廢弛時則鄭人有子矜之刺泮宮能  
修時則魯克獨興思樂之頌其他教化陵夷風俗頹敗茂國

不然吁學校之有關人國也焉可誣哉仲尼有憂之以其學制者寓書法當時雖若無補而百王治道蓋此宗焉吁秦漢以降國家治亂考諸學制可見耳我皇元文教經宇內凡幅幘數萬里荒陬僻壤無不建學廩廩嚮乎治矣況景陵爲內地其可使學宮侈剝蕪滅不稱聖人之居乎舊制弗葺縣文學荆門州傅珪始至則惕然曰有如夫子廟學不治罰其可辭則歲廩單惡弗克究於時沔州守汲郡安侯朝列行部勸課蒐剔隱伏得豪右侵占乾沒學田者八九人皆股栗喪魄披露首服視舊租入增爲石者壹阡四百有奇繼以監縣忽都不花承事教諭傅珪則鳩工度材晨夜展力悉究而一新之有嚴其門有覺其堂齋廩翼翼庖廩殖殖學宮有次師生有膳先是禮器朽蠹迺范銅而鑄之爲器一百五十餘件肇

工於至元三年十一月至至元四年戊寅秋七月十有九日

壬子訖工且請于蜀郡景坤厚曰子爲我志之余不敏鐫名

于石敢不懼與然則非我聖元無以廣其制非安侯無以啟

其功非忽部不花承事傅珪無以旣厥事是則書志也觀王

制者於此乎取可不懼哉相與樂成者主簿程古迭兒將仕

縣尉汪文義與典史李彬司吏徐仁富江朝宗耆儒王天與

龔鼎和至元四年秋八月吉旦蜀郡景坤厚拜手謹記

鍾敬鍾昭黃中羅三黃桂劉漢用解仲祚黃榮鍾

土榮鄧良佐張允恭

儒人李天俊倪鎮陰天陽羅惠周新姚文顯

縣吏張壽山應口蔣口賈榮虎撤盈朱則智鄒文

富

承事郎沔陽府景陵前縣尹兼勸農事呂希升

奉訓大夫河間路清州知州兼勸農事王欽等立石  
馬案右碑題湖廣等處行中書省進士景坤厚撰承務郎  
武昌路通城縣達魯花赤兼勸農事完迭帖穆書丹朝列  
大夫沔陽府知府兼勸農事安禮篆額後題至元四年秋  
八月吉旦蜀郡景坤厚拜手謹記又後題承事郎沔陽府  
景陵前縣尹兼勸農事呂希升奉訓大夫河間路清州知  
州兼勸農事王欽等立石碑文內敘列監縣忽都不花承  
事傅珪主簿捏古迭兒將仕縣尉汪文義典史李彬司吏  
徐仁富德江朝宗耆儒王天與龔鼎和文後又列儒人縣  
吏等姓名二十一人額爲景陵重修儒學之記八篆字碑  
中前三行姓名直書其餘人名字略小並列左旁今在天

門縣學戟門外東間向

湖北金石詩注

義勇武安英濟王碑

碑在書和門

義勇武安英濟王碑

額正書

應山在古□□□□神□□□□□□□惠澤在人則廟

而祀之也亦宜神始事昭烈爲軍司馬昭烈數失軍跳身而  
與之周旋不避險艱漢日浸微黃星□芒天下士子雲趨以  
從雖荀文若不免失正神獨以忠義自許乃能擇士君子所  
不能擇者□□□□□□□□原欲與神共事神不義其所  
爲辭重爵而出亡劉□雖微舊恩必報則其忠義之氣□千  
載而常存者也□欲奪身殺操劉主不可卒用困躓議者恨

其失策在荊州時北兵討樊圍仁虜禁操將避其鋒而徙都  
□□□□□□病操者莫神若也操非不欲□元天下  
而畏天下義士士有義心而勢足以病□則操亦不畏勢足  
病操而心不在漢則操亦不病惟神以忠赤之心義倡其勇  
以一州而□動中原權不渝盟漢事成矣然則漢祚之少延  
西日之未墜神葛之功也神之將死權欲留之而彼之謀臣  
皆知其終不爲用則忠義之志不獨著於國中而敵亦知之  
非精誠有素者不能也傳稱盛德者必百世祀神以身殉國  
子復死孝血食幾絕匪天道也運益衰明德若舜者不可復  
見苟一節之盛祀之可也況應民□祖先實受其賜爲之雲  
仍者可不思其所自邪縣故無神祠民皆家祭□禱褻賁弗  
欽少府胡君始以母疾禱神獲應乃出已力構廟像於縣治

之東北承以門廡繚以周牆凡屋之以間數者二十有二厥  
土辟剛厥位面陽前列平田後枕山阜軒豁爽塹囂塵不至  
禱而祀之不戒以肅於是邑之士子合辭以請曰惟神以忠  
義著名於古而少府以孝承之於今惟忠與孝人道大紀粵  
若稽古神道設教而碑名不立無以勸今傳後余惟怪神之  
事儒所不言而神之大節章章見於史邦民不忘其本始神  
生能利澤之死猶驚動禍福以血食其一方□□靈也已乃  
作歌詩以妥神靈

漢日西墜

妖星耀芒

九州輻裂

羣雄鴟張

桓桓先主

惟賢是與

神寶爪牙

復任□□

捨徐適荆

南土是營

大戰赤壁

□□墜兵

操雖北遯

仁禁尙強

神大破之

復表舊疆

權譎不天

蒙遜作諼

襲據其後

與賊相連

神以忠死

宜享廟祀

碑之有文

實稽諸史

至元四年歲次戊寅□季冬吉日立石工洪國祥鐫

從仕郎安慶路經歷陶瑋撰

從仕郎德安府應山縣達魯花赤兼勸農事鐵木兒

不花題

德安府應山縣尉王安仁書

馬案右碑題漫滅莫辨文亦殘缺參半文後係以四言詩  
二十四句年月低五字題至元四年歲次戊寅季冬吉日  
立石□洪國□鐫沔陽府景陵縣醫學教諭張濟民寫德  
安府應山縣尉王安仁書□從仕郎安慶府經歷陶瑋撰  
文從仕郎德安府應山縣達魯花赤兼勸農事鐵木兒□

花題忠勇校口中興路枝江縣達魯花赤兼勸農司事李  
羅口口以上作五行尙可辨識篆橫題義勇武口英濟王  
碑正書六字在應山城北里許關聖祠頭山內東首牆上

向南

湖北金石詩注

九宮山欽天瑞慶宮記碑

未見據金石存佚考補入

至元皇帝臨御五年歲次丁丑夏四月集賢大學士臣咎刺  
八都爾等奏特進上卿國教大宗師臣全節言今海內名山  
福區道家祝釐之所宮觀圯而復新者五九宮山欽天瑞慶  
宮其一也皆未有賜碑請敕臣分紀其事以昭永久制曰可  
於是欽天瑞慶宮之碑屬筆於翰林侍講學士臣元中命中  
書左丞臣懋德書丹參知政事臣有壬篆額明年本宮住持

提點車可照具頓末來京師臣元謹按九宮山爲古今名勝  
岡巒繚亘數百餘里唐人陶姚二仙結菴山中去迺蔡弗宋  
瀛熙中眞牧眞君始舉闢此山剏建神宇旣道法靈善於光  
宗之居儲恩錫昭陳於圖宗之在位畀以宸翰賜以欽天瑞  
慶宮額詳見尙書長沙易公紱開禧元年之記宋末己未燬  
於兵至前至元十三年內附天朝住山大本封君復之翰林  
承旨吳興趙公孟頫爲之記延祐甲寅山有災宮爲所燬今  
住山車可照復之垂成至治辛酉又災可照復之志彌堅經  
營十有五年始克落成首作眞牧眞君殿翼以御書巢經之  
閣傳以東西方丈次作法堂曰天光之堂旁列圖眞都仙眞  
官山王四祠輪奐雄偉甲於諸方宗師嘉其隨廢續成改觀  
之美猶多其思致宏深規度開廓蓋方外智士圖門之忠臣

也於是奏請得旨申命詞臣鋪張厥功銘之樂石可謂盛矣  
系以銘曰

吳楚之墟斗軫之交山名九宮靈氣孕包唐有唐姚結廬煉  
眞上仍丹邱委於荆榛至宋眞牧載別舊例行通於天夢協  
於帝以佐累洽時維光臨有赫靈貺會於內廷命宅茲山作  
室千礎賜以奎畫照耀南土曾未百年歸我皇元我元熙風  
軼古義軒德明惟馨如於上下神來續續錫我純嘏順我之  
方民從於雲會孫千億言壽靈君靈不遑處民用戰兢畢方  
爲妖不廢易輿乃作新宮乃設崇嶽輦石樅木民足不跂靈  
君無爲孰主孰維惟此高士載謀載惟天朗日晶層雲疊霞  
列室鱗次眞仙之家自下望之逸若霄漢林麓蔽虛金碧灼  
爛有烝者徒置塾延師學道之餘讀書誦詩罔流之宗奏疏

上前請~~經~~嘉績垂示永年詞臣摛文陳述帝力神之聽之報效家國山連匡阜數應九九符我乾元天子萬壽

翰林侍講學士歐陽元撰中書左丞王懋德書丹參知政

事許有壬篆額至元四年在通山縣

金石存  
佚考

### 南平樓記

佚據學古  
錄補入

昔我國家之經營四方也嘗以重兵戍襄樊臨制東南旣而圍襄六年而克之遂以取宋南薄嶺海莫不率服區宇旣定撤兵以息民其畱鎮襄陽者兩萬戶之兵也於是其帥楊侯珪以至元五年卽故山南東道節度之牙門作新樓於其上戎幕治焉姚文公名曰南平而爲之記落成之日作楚人之歌以相之至於今六十有餘年矣其爲樓也屹然中郡而高

起風雨旋薄歲久不支今萬戶明威將軍完者禿懷大將軍  
楊克忠武略將軍也先帖木兒茸而新之則仍改至元之六  
年庚辰之歲也既成以書抵江南求予記之嗚呼襄在荊豫  
之交水陸之會自古形勝之國也世祖皇帝神武制勝之蹟  
在焉非文公之雄文震蕩悲歌慷慨殆不足以當其山川而  
集何足以言之哉今夫襄爲城額額千里北出方城渡沔水  
達乎周鄭晉衛之交東出平阜彷徨乎陳蔡齊宋之野大車  
之彭彭駟馬之洋洋攘攘紛紛爲利祿而往來者塵相及而  
袂相接則背者戈甲之所趨芻餉之所輸也湯湯江漢之流  
布縷漆革禾麻菽麥衣被乎東南湖海之間者則又皆昔日  
竭其民賦疲於奔命以自救之徒也原田晦晦十千其耦林  
樹邑屋參伍鱗次比鄰婚姻飽食以嬉燕息而歌者則皆前

日深池高埔畫戰夕備不能一朝居之地也嗟夫天下之治  
平久矣海內一家偏方下國恃險阻以自固者悉以剗削消  
磨而復其遺跡况夫襄之爲郡蔚爲內地涵煦聖化休養生  
息之深厚者哉士大夫鞅掌王事之餘馳驅之暇樂其風俗  
之[澗]美士力之完復於是有逸居安食之思而四方遊士賓  
客以相後先他郡蓋莫之及也而爲之民者幼者壯壯者老  
老者日以盡矣徒知其長子老孫養生送死之樂豈復知有  
祖宗經理艱難之功師武臣力之故哉想夫元戎當歲時之  
豐樂軍士之休[監]與其守臣賓佐吏士飲酒作樂於斯樓也  
憑高望遠徘徊四顧觀夫人民城郭山川草木於煙雲晦靄  
之間道先世之功烈以認其子孫使無忘警戒於無虞而世  
世係茲樂土以奉國家威德於無窮則自三將軍始也峴山

之崇檀溪之深視彼異代之士慨盡瘁於一時使遺名於後世而自託於茲者則可以一慨也矣

南平樓記庾集撰後至元六年在襄陽府

金石存佚考

### 尊勝經石幢

寺經閣書記  
正書在江陵

尊勝經幢山南肅政廉訪使賽因不花建後至元六年在沙市之白船套觀音寺旁 賽因不花以江陵多水患刻此經於幢以鎮壓之字漫漶不可識又以蒙古國書附焉 崇禎十一年提督荆關拙分錢法工部主事豫章熊汝學護以石闌并爲志其緣起其書丹則古亭州生員邱培也 今熊碑久仆嘉慶己未以事至沙市僱數力扶而觀之乃具得其始末然府志職官竟未列此兩人姓名何哉荆關

主抽分而兼督錢法者崇禎初荊州抽分主事朱大受言  
荊州上接黔蜀聯江廣商販銅鉛畢集一歲可以四鑄故  
也

嘉慶志

### 舍利塔記

未見

舍利塔記正書字大一寸至正元年在望河店

安陸縣志

### 興國路重修教授廳記

存正書在  
正興岡

後至元庚辰秋予自西江來興教富川初至太守申侯肅以  
賓禮卽與語曰郡庠非不壯也學廩非不足也歲計非不充  
然有餘也前職此者往往屈力單慮志弗及行朱夫子云教  
授者以天子之命教其邦人領護廣學嚴祀聖師圖書服器

之藏金谷出納之事皆獨任之責匪輕也今迺無蒞事之所  
容膝之居將何以責其盡職哉子儀圖之承命退而考諸圖  
誌及門閭等碑皆具載乾道庚寅徙學城西嘉定甲戌處守  
以學路並民居迂隘山公田易寺之池四岸植柳中蒔蓮立  
泮水詠歸二亭爲坦途以便上友之來往學之東偏則有教  
廳視其舊基則頽垣荒草如適莽蒼者塵存者殘碑耳因念  
茲地重興豈非有待於斯時哉遂白之于府出粟捐資度地  
擇材售匠以直計工以備先葺堂居次建公廨爲屋凡七十  
四楹瓦甍五萬結石六百餘尺工食之數亦如之黜堊丹雘  
莫不畢備於是創大成雅樂新從祀像設祭服完庖廩其庶  
幾學校爲有成矣贊其成者實幕府李仲安王通輔予不敢  
憚勞夙夜奉公惟恐其行之弗力焉嗟夫行之以力非其人

則力不能致待之以時得其人則時不復失傳曰待其人而後行者良有以也申侯名克溫字直夫南陽人今以美解去繼守茲郡者爲憲使焦公之嗣名思忠字恕卿世居南宮禮賢崇化好學善書因請以敬敷二字題其堂并轉前後教官姓氏刻諸石 至正元年歲在辛巳六月望日庚中建郡文學掾臨江南洲傅行簡記并書

興國路重修教授廳記傅行簡撰并正書至正元年在興

國州學

金石存佚考 按此碑分三截刻與他碑異下截模糊不辨核之碑文則前後教官姓氏也

武昌大洪山崇靈萬壽寺記

佚據文獻  
集補入

鄂之城東有佛刹曰大洪山崇靈萬壽禪寺此黃鵠山也而謂之大洪山者蓋大洪隨之名山自隨而鄂自鄂而許地雖

易而名號不殊示有所本云爾鄂今爲武昌山距城十里而  
近北枕江漢南帶湖湘東居壽昌下瞰樊水層巒疊巘交拱  
互揖西接城□民堵萬區前臨通遠而市聲邈不相及山之  
顛有岳忠武王手植巨松斗牛亭仙人石鼓崖尤爲奇偉地  
位峻絕風物清閒寺特據其尤勝處邇其所自出推靈濟慈  
忍大師爲初祖大師諱善信以唐武德二年四月六日生  
於洪州南昌王氏受度於本州開化寺爲眾僧執爨三月僧  
力卻之大師涕淚雪泣戚嗟不已有老父告之曰汝緣在  
南方眾不容盡行矣乎逢隨卽止遇洪卽住大師遂挈瓶錫南  
還以寶曆二年秋抵隨州覩一山巋然問於逆旅主人曰此  
爲何山答曰大洪山大師惕然思老父語則延緣而入至於  
山麓諸水所焚匯爲重湖神龍居焉旱乾水溢有禱輒應時

久不雨鄉人張武陵具羊豕將以致禱大師見而悲之謂武  
陵曰雨暘不時本由心感害生自利徒增汝罪可戒勿殺而  
爲汝祈約以三日必雨武陵聽之大師探幽履險得山之北  
巖泊然宴坐運誠默禱及期雷雨大作雨旣霑作而止武陵  
訪求大師於巖中大師時猶在定蛛絲繫面附耳而號挂體  
而搔久之方覺武陵遂施以其山爲建精舍太和九年二月  
二十五日大師密語於龍神曰吾前許以身代牲輟汝血食  
本舍身可享吾肉卽引刀斷左右足白液滂流儼然入滅雙  
足畱鎮山門肉色久而不變四眾哀慕稱之曰佛足有司以  
聞於朝賜號慈忍大師所居精舍賜名幽濟禪院後以禱祈  
屢有奇驗累加大師號曰靈濟慈忍其佐神千有二封爵自  
王而公而侯等差不同皆天下知名之神威靈烜赫被於四

方此隨之洪山也宋末隨數被兵洪山又當其要害爲南北必爭之地邊境之民旣多流散叢林之下亦無以安江湖置制使孟公珙隨人也與都統張公順謀遷尊眾適於樂郊乃度地於茲山請雲庵興自隨捧佛足及累朝所頒告勅徙寺額僑置焉仍奏請賜今名曰崇國萬壽寺□興爲之開山此則鄂之洪山也興之徒無諍須則□實繼之我世祖皇帝在潛邸時南伐駐蹕鄂之元興寺遙見茲山之頂有神人立於雲端詢知爲大師化迹所寓深爲敬異暨班師實因留佛足扈從至京特命安置於祕宇而嚴奉之上旣正位宸極有旨遣使偕實護送還山道出許州佛足重莫能舉使者歸奏詔卽其地建寺此又許之洪山也鄂經摧陷之餘實又去不返呂文德制置江湖請無積□主之而寺以復新繼之者緣庵

遇建靈濟塔增置菴院土田而□崖潤無邊詠竹谿禧又繼之寺以災毀禧方謀起其廢俄委順而化至順三年今住持華公實來毅然以興復自任積衣孟之貲躬求良材於江上造大棧以歸顧舊址局於地勢隘陋褊迫位置不皆合於規式乃夷崇岡堙巨壑累石爲基使就顯敞首創大佛寶殿棟宇之制悉擬于京師列刹而華飾有加焉兩廡山門之上爲萬佛閣演法栖僧有堂輪藏及祖師王公有殿天書有閣而鐘樓經臺丈室茶堂旃檀林前賓寮庫庖廡之屬無不畢備始作於元統二年之某月訖工於至正某年之某月費錢總若干萬緡出於華公者一萬出於耆舊僧宗森者二萬餘皆出於眾施及經用之羨財金碧髹彤輝映林谷宏模偉觀人天具瞻其在先朝嘗以爲中宮祝釐之所頒以香燈金幣

褒禮甚厚三大洪山法席之盛莫武昌若也華不遠數千里  
來微文以記之潛竊以毘盧身上周徧一切三千世界一一  
須彌無去無來非彼非此然則山未有寺法界宛然寺之既  
遷依然故處增減成壞之相了不可得豈世俗文筆所能記  
乎若夫法身大士示□有爲於始幻境作饒益事應化之迹  
亦有可得而言者庸次第本末俾歸而刻諸華別號枯木嗣  
法於靈隱悅堂問禪師云

武昌大洪山崇甯萬壽寺記黃潛撰至正□年

金石存  
佚考

損菴益公道行碑

存正書  
在應山

損菴益公道行碑

額篆  
書

中奉大夫管領大開元一宗諸路都宗攝圓照普門光顯古  
禪師寶林禪寺第四代住持損菴益公長老碑銘

嗣林濟宗英悟正印宗慧大禪師前大都大竹林寺  
住持傳法沙門雪澗禎吉祥撰

翰林學士承旨榮祿大夫知制誥兼修國史孕兒只  
班書丹

集賢大學士昭文館大學士榮祿大夫司農兼御史  
中丞蓬山張晏篆額

師諱洪益號損菴姓徐氏隨之應山人也以中統四年九月  
二十九日生自幼不茹暈天賦甚穎異聞至言多警悟體若  
不勝衣而意氣實雄萬夫然無嗜俗意年十五從石龍山寶  
林寺善公祝髮肄習道業晝夜不息既具戒益奮厲卓然以

徹證自期徧詣方參宗匠遇白雲治公識其根器靡常授以  
心印且囑之曰汝必際盛緣向後於老僧頭上有萬丈光明  
汲引從來隨種視病宜自勉焉大德三年歸□值寶林嗣代  
乏賢眾欣迎以主方丈師慨然以古道自任十一年遷嵩山  
法正聲價益振四方學徒嚮風大至冠蓋縉紳望塵加敬至  
大四年承詔遷主開元開元乃古之名刹也□雲寓指統一  
宗制度典獻雖存而大紀□□師至未幾顏綱復振主上聞  
之深嘉乃續延祐丙辰特授中奉大夫制加圓照普門光顯  
大禪師錫二品銀章賜金襴衣命都攝宗門事英宗臨祚因  
德升問親詔褒美泰定乙丑趣闕聲謝明年又加特旨至順  
庚午辭歸故山壬申詔復徵還元統甲戌力以疾辭退怡於  
寺之西偏嘗有句云莫將世事累青眼畱取閒雲伴白頭尋

復□歸于石龍山之舊址杜門卻掃澹世味惟學徒填□弗  
容力拒別其他之子弟雖抱奇韞勝皆自不慊蘄一語以相  
百諾者又紛然麀至師咸與進獎抑淬厲以器之至元庚辰  
嵩山少林祖庭虛席僉謀舉闔以嘗之三探三得眾皆愕視  
相謂此無乃鼻祖意遂專使具疏幣以必得師爲囑使者致  
命師引□□然曰吾今耄矣□夕人耳幸勿以是見累也汝  
亟去毋費辭使祈哀逾旬敦逼再四且曰不敢以寺務累惟  
乞師至□□宗盟豈不與叢□有光卒辭不獲黽勉治任而  
行旣至少林因風丕變衲子輻輳凡一時麟龍爭願出席下  
師居無何忽一旦自知時至罄以衣鉢昇常住越三日具浴  
更衣搥鼓升座示眾以無生忍法弟子號慟請畱師乃瞪目  
叱曰大無□□生遂瞑目跏趺而逝時庚辰冬十二月十九

日也。莫能七日。容色如生。閣維祥光。燭空收舍利。如菽不可計。師存日。嘗稱壽塔於石龍舊山之北。原次年辛巳春。迎取餘體舍利藏于其間。寶林住持浩公。知余與師契。乃遣徒求銘於予。予辭曰。師之行業。匡維季運。彰人耳目。誰得暴白而磨滅之。邪。答曰。山門以師齒德位重。足以表百世。宜刻石以昭來裔也。余避其言。不敢終辭。故書以授之。師卒時年七十有八。臘六十。有四。其徒七十餘人。嗣法者二十餘人。浩寶林其嫡也。餘皆金玉其聲。吁。師之道德崇峻。人天嚮仰。累朝寵命。歷處名利。而師了一真妙斷。諸緣想未嘗以富貴沐其心。律身之法。愈勤愈嚴。布衣糲食。蒲團竹几。甘淡苦節。脇不至席者數十餘年。師嘗以佛魔同一關鍵。開大捷經。宏正知見。燕坐覺場。攝化四眾。故蹟彰于江漢。聲聞于中原。化流於窮

髮皆師勲德感召嗚呼世降以還道術爲裂幸而聖朝光霽  
佛運因之以宏師非古佛出世而亦莫能綱吾宗也未知後  
來作者孰有能過之者也因爲之銘銘曰

凡物之性

靡不有初

及究其終

來去同途

師宏至道

高超物表

巍坐道場

作獅子吼

天人俯仰

聲遍九垓

回首少林

撒手懸崖

堅髑不朽

竈于石龍

神鬼呵護

夜光瞳瞳

匡扶末運

其如後何

勒之于石

萬古不磨

至正二年歲次壬午七月吉日

中順大夫德安府達魯花赤兼勸農事迷兒哈口立石

馬案右碑連額高七尺五寸寬三尺七寸首行題中奉顯

大禪師寶林禪寺第四代住持損菴益公長老碑錄第二

行低四字題嗣師濟宗英悟正印宗慧大禪師前大都大  
竹林寺住持傳法沙門雪澗順吉祥撰三行題翰林學士  
承旨榮祿大夫知制兼修國史朵兒只班書丹四行題集  
賢大學士昭文館大學士榮祿大夫司農兼御史中丞蓬  
山張晏篆額額篆損菴益公道行之碑八大字碑云師諱  
洪益號損菴姓徐氏隨之應山人年十五從石龍山寶林  
寺善公祝髮延祐丙辰特授中奉大夫制加圓照普門光  
顯大禪師錫二品銀章賜金匱衣命都攝宗門事英宗卽  
位趨闕至順庚午歸山庚辰十二月卒年七十八云云後  
題至正二年歲次壬午七月吉日本行題中奉大夫德安  
府達魯花赤兼勸農事迷兒哈口立按元史列傳有朵爾  
直班字惟中畱心經術喜爲五言詩於字畫尤精至元二

年除翰林學士又除制誥尋加榮祿大夫爲平章湖廣卒  
於黃州蘭溪驛以時考之卽此朵兒只班也獨結銜不題  
平章湖廣豈當時尙未官湖廣邪碑今在應山縣城北二  
十里寶林寺

湖北金石詩注

### 景陵寺碑

未見

景陵寺爲元至正二年僧洪遠開山其護法神石像碑上  
作蒙古書下正書景陵禪寺碑後偈二首

安陸縣志

### 中興路勅建九老仙都宮記

存正書在江陵

九老僊都宮者中貞明教玄靜真人唐公洞雲之所建者也  
玄靜遭遇聖代肆揚玄風晚歲被旨領中興之玄妙觀旣而

漢源縣令松滋陳君一廬以中統楮幣一萬五千二百餘緡得城中公子術張氏故居願建眞館以奉祝釐未幾前江湫摧茶副提舉同邑傅君文鼎又以楮幣一萬七千五百緡增助之請爲眾倡已而四方樂助者繼屬其不訖者[玄]靜悉濟以已貲乃作三清正殿至於門廡法堂方丈雲堂等屋以次興舉荆門義士陳君該父子又割楮幣六千七百餘緡塲天尊眞人像金碧眩耀甲於城堙至元五年歲己卯有旨特賜九老仙都宮之績俾洞雲並[玄]妙兩山主之仍飭有司加庇衛焉至正癸未春走倅以書具頌末抵元謁文記其事於石[玄]靜又自敘家世履歷曰吾家故宋參知政事質肅公介之後也世遠家寒父母遣從老氏學初師佑聖堂李公雲庵旣而紫府觀駱公遜齋又法嗣之而教之曰子雖學道當讀儒

乃可由是從事佔畢終日未嘗釋卷數年遂通大義間爲詩章士大夫輒稱誦之父病嘗割股糜中以進母亡雖空乏猶竭力資薦一日將作齋事需蠟爲炬無從得夜夢至樹下有白鬚老人遺以金釵一股明日偶憩樹陰仰見樹有大窠俄蠶自窠飛集身因憶昨夢退取斧斯樹得蠶房無算致蠟數十斤給用鄉里至今能言其孝感大德初入京<sub>玄</sub>教大宗師開府張公畱孫雅見器遇時奉旨建崇眞萬壽宮命董繕克稱厥任尋設荆襄道教都提點所選爲掌書記會提點陞總攝仍<sub>元</sub>是職至大初乘傳從宗師特進吳公全節奉御香醮江南諸名山皇慶中璽書授誠明中正<sub>玄</sub>靜法師江陵路<sub>玄</sub>妙觀住持提點紫府眞應宮住持兼領本路諸宮觀事建祐中改授宣命師號及住持提點諸宮觀如故爾後奉詔遇

天壽節乘傳由香醮襄陽之武當歲數四率以爲常龍虎三  
茅閣章等山亦屢給驛直往修醮事天<sub>厓</sub>初集賢院奏爲御  
位下承應法師每歲扈從上京二年宣賜中貞明教<sub>玄</sub>靜真  
人是年游以天壽節奉詔馳驛蒞祠武當若荆門之玉泉中  
興之<sub>玄</sub>妙崇福常德之桃川就命徧祀事竣遂歸故里里中  
故家巨室耆舊老人喜其來歸相與欣助克成茲宮聖恩如  
天特賜之額願惟生平勤勞晚節樹立即其所業究其所爲  
固得以效君親萬一之報允謂慶幸然恐歲月之久將遂無  
聞惟善修辭願以不朽者爲託余按唐質肅公實江陵人其  
立朝之節清忠諒直視唐顏魯公無愧神仙之資不在其身  
而在其後人理蓋然也荊州當朔南西東之交天下山水觚  
理皆發自西古今仙佛之教往往自西來入中國是故江漢

之壤西接隴蜀多大山修谷福地名區其人亦多高年遺世之士卓行絕俗之流若老萊子漢陰丈人楚狂接輿要皆莊周列禦寇之流亞也今九老仙都宮作於江漢之都會創始於質肅之後人豈非山川蓄泄之靈國家會通之化久而彌章前修之流風餘韻有足徵於是者乎何可無記雖然地以人而勝神依人而行繼自今嗣國靜而居九仙者尙克念於茲則元屬我紀述之意可永無壞也

中興路勅建九老仙都宮記翰林學士資善大夫知制誥同修國史廬陵歐陽元記宣文閣授經郎文林郎兼經筵譯文官臨川危素書通議大夫禮部尙書宛邱趙期頤篆額至正三年癸未三月初吉在荊州府北園妙觀碑以乾隆五十二年卜嘉慶己未予至荊南廉得之以語張太守

雪筠命工重立字畫皆完好志中所載闕誤十數字悉爲  
更正洞雲本國妙觀住持及陳一濫等建宮于公子街遂  
賜額九老仙都宮并令洞雲主之是宮與觀爲兩地也奈  
碑乃在國妙觀中迄今之觀卽元時仙都故址而所謂公  
子街者卽在於此前明沈觀察一中所撰記乃謂觀爲洞  
雲所創而歐陽元功記其事是不知宮與觀之爲兩地矣  
又謂觀一徙於縣學前再徙于城北是又不知今觀卽元  
宮之故址也至言明初觀在行省旁則今不知其所任焉  
金石存  
佚考

鐵塔寺塔記

存正書陽  
文在隨州

馬案有鐵塔高三丈列九層至正三年十一月吉

下又題  
缺

隨州隨縣雙泉山崇明前代住持義元與拯謹袖衣鉢命  
匠鑄造法華寶塔一座□□佛恩祝願皇圖鞏固帝道遐  
昌佛日增輝法輪長轉以義元上至非非想下金水輪情  
與無情俱害利以蓋恩想報三有□意世界有情同園  
種智恭千三寶證明天龍同鑒云云其餘每層每面繪圓  
光外上左右皆書佛名約以千計在隨州城南六十里洛

陽店

湖北金石詩注

清烈公廟記

木見據樵川集錄入

蓋歸州清烈公廟記者廟記之所新作也按職方屈原名評  
與楚同姓秭歸人佐懷及襄以讒故自沈汨羅有離騷二十  
五篇凡五卷傳於世舊宅在今州治西偏十里江之北唐元

和十五年刺史王茂元始創卜祠宋元豐三年封清烈公邦  
人爲立廟迨至泰定初間州尹王禿哥不花嘗修之久而撓  
無以妥靈將遂堙廢至正壬午郡長密兒可焉奉議新之出  
廩祿以倡助者雲合既撤江忽暴漲巨章蔽中流而下募善  
水者致之得柏木數十大者以爲棟梁小者以爲榱桷門堂  
寢宰咸資其用堅貞雄壯文理芳潔於神居甚宜民歡呼曰  
我侯興土木財不傷民不撓神輪鬼運陰或相之蓀壁紫檀  
桂棟蘭檠無以加也方成適湖北道僉憲耶律恆齋公按部  
聞而嘉之俾予書其事愚觀屈公事君盡忠死而不二卓然  
立窮壤如三仁夷齊千百載僅一二見其所述作託物以寓  
諷諫修辭以明仁義當風雅三變之餘增綱常萬鈞之重世  
所不可少也雖無上公之命祀典其可缺乎是邦山川草木

儲精挺秀陰陽物變發爲昭明星而主之以爲憑依之所固  
求神之道也人臣受命天子司牧有土四境之內孰非一氣  
所通修祀以交神明誠非異人任第昧者弗察或惠及鰥寡  
而於神不復致力或不務民義而徼求非望之福胥曰失之  
今三峽居民生理鮮少催科日有弗給他宜弗恤而侯於是  
邦乃能不役一民百廢具舉可爲難矣於法應書旣載其年  
月終始復爲迎神送神詞各一章以遺其鄉人俾歌以祀焉  
迎神之詞曰峽之山兮虎豹藏峽之水兮蛟龍驤神陟降兮  
在帝飭芟荷衣兮芙蓉裳龍爲宮兮貝爲闕珠樹白兮上明  
月桂醕陳兮蕙肴設悵夫君兮久離別江雨過兮生蒼苔麝  
蕪香兮杜衡開歎逝者兮無息忽秋去兮春來送神之詞曰  
雲悠悠兮下微風蘋花開兮雨濛濛蒼崖中裂兮岷江通靈

之來兮如龍胞何爲兮擊鼓魚何爲兮在戶世湛濁兮不可  
話我將之兮帝所秋水兮今階前曉筵散兮落花間鳳凰忽  
忽兮高舉芳樹緣兮空山

屈平廟負山面江有元至正甲申湖廣儒學提舉黃清老  
碑碑載唐元和十三年刺史王茂元始創此詞宋元豐三  
年封清烈公復立廟云

蜀道驛程記

清烈公廟記黃清老撰至正四年在歸州

金石存侯考

重修廟宇創建譙樓記

古北書  
在襄陽

襄陽重修廟宇創建譙樓記

承務郎襄陽路總管府推官燕山進士前祕書監典

簿韓瑛篆白

從仕郎襄陽路棗陽縣尹兼管本縣諸軍奧魯勸農  
事王麒書丹

棗陽隸襄稱上邑昔爲金宋戎馬蹂躪之墟天兵平亂之後  
官舍草創廳事隘陋莅政官屬每有寒暑淩燥之憂至元六  
年庚辰秋朔庭啟臺不花清卿公來監是邑治事廉平庶務  
無不經意任爲己責欲謀新之且謂經始勿亟恐以非時傷  
民力邑士何豫通君安願悉輸其材植監邑欣然禮之明年  
四月筮以伐木爲良肇工徐圖損資以運之止期構廳事爲  
謀未他及適太原王君麟輔應內職以清白端正選尹是邑  
下車之初顧其前後棟宇零落案牘勞亂胥吏羈縻噫貽良  
久憤然有志於治郡開之以仁義律之以敬勤從宜處約民  
蠹頓息良善受職威信風行僅三月而頌聲作卽諭於監縣

清卿公曰嘗聞治官於治家缺者補之舊者新之盡心焉耳  
矣尸位苟祿所不忍爲今庶事之墮久矣且以廳事之湫隘  
日就頽圯匪爲不足崇觀瞻於下且分憲按治而爲寒暑陵  
逼殆非所以盡吾事上之道去故更新孰曰非吾輩分內事  
清卿公曰予爲此謀久矣力不足也公念及此期必有成二  
公協謀捐俸命吏經營邑士周明駱毅牛福石如寶葉景等  
有餘力之家聞之欣然各以其私錢來助吏勤工善眾力具  
舉椽之丁丁築之登登崇廣舊基盡口頽弊柱石堅良比舊  
雄麗斷弊黜堊煥然一新建廳事七楹高明爽塏有左右室  
區曰帥正北建後廳五楹有左右室帷帳茵褥鼎新舊製一  
時俱成以分憲至止區曰肅清西北建幕司五楹軒窗虛明  
旣深且邃東北建庖庫百須器備東建幕廳五楹區曰資始

西建架閣五楹左右司房仍舊員儀門外築臺二丈有奇上  
建譙樓五楹鐘鼓滴漏盡角咸具扁其外曰明遠內曰揆時  
吏不知勞民不知怨價給其值而不科夫受其傭而不斂作  
以至正二年壬午越明年癸未三月丙辰告成尹介予曰夫  
事功作之雖難而守之亦難子儒士也能聞善記其事於左  
俾後相繼者知其作冊之難而不輕毀焉予按古制縣地方  
百里懸於郡國周之時王制以壤後及楚莊始霸滅陳得地  
因其廣狹生類族夥置官監牧後因其制莫易漢唐署官有  
令主簿尉其於令選尤慎重焉厯我皇元官制品秩於是職  
益謹嚴中統迄今八十載餘稱是任者無幾廢宇之堙圯因  
循而往者非一波頽風靡欲求其能苟且修葺以塞其責已  
鮮矣尙望其有他哉於是益信斯舉之難也且邑舊無尉司

官吏每就民居鞠發盜事二公倡謀於縣治之東營廳事以  
居司馬固固咸完亦皆嘉謀之所及也斯時以監縣慈惠忠  
勤令尹之廉明果決繼之以主簿張君元長之剛勁毅達相  
與恢宏其量則豈徒協謀於是而已哉將見固斯民於太和  
之域黃童皓叟含哺鼓腹而頌太平絃歌溢耳則斯邑誠爲  
眾表其芳名遺愛流於後世信非斯民之幸與至正三年歲  
在癸未仲秋之月前江都縣教諭瑞陽王泰來記 至正  
四年五月吉日

從仕郎襄陽路棗陽縣達魯花赤兼管本縣諸軍奧  
魯勸農事朔庭啟臺不花

從仕郎襄陽路棗陽縣尹兼管本縣諸軍奧魯勸農  
事太原王麒

將仕佐郎襄陽路棗陽縣主簿河南彌遠立石

馬案右碑上半截字尙完好下半截盡行磨滅首行題棗

陽縣重修廟宇勸建譙樓記第二行空八字□□郎襄陽

路總管□□□□進士前以下漫滅莫辨後題至正四

年五吉日空從仕□□陽路棗陽縣達魯花赤下末行兼

管本縣諸軍奧魯勸農事太原王麒空將仕佐郎棗下

半剝蝕殆盡莫識撰書人姓名碑中云不花清卿公來監

是邑清卿公亦不知何許人錢辛楣先生云清卿卽不

花之字元人多有此稱非別一人也湖北金石詩注

玉泉寺鐵釜

存正書陽文在當陽

至正五年歲次乙酉十一月吉日鑄造生鐵三千斤

馬案石元釜題至正五年歲次乙酉十一月吉日鑄造生  
鐵三千斤二十字口內徑五尺三寸深三尺三寸邊寬一  
寸八分字甚草率湖北金石詩注

重修興國路大成禮殿記

存正書  
在興國

文不可辨

重修興國路大成禮殿記碑資政大夫行湖廣中書左丞  
吳繹篆額奉議大夫江西等處摧茶都轉運使司副使王  
思哲書丹九江後學張中謨文至正五年碑在興國州學  
已泐碑刻大例以撰文居前次書丹次篆額此乃以位爲  
序列撰文於末行亦足以覘風會之遷流雖文字不免也

金石詩  
法考

碑陰

未見據嘉慶通志錄人

興國有學郡志不一難考顧末惟宋嘉定七年郡守虞公旂  
孫任內撥公田換寺僧地爲泮池築隄路碑記有云學宮徙  
城西自乾道庚寅始卽今址也相去幾一百八十年禮殿朽  
蠹滋甚至正初元辛巳九月太守焦公下車顧瞻欽頌首議  
興建計學□□□□□□□□斥浮蠹□□□□□□□□  
□□□□□□□□□□□□十二月給價置木經畫旣  
定以甲申二月命匠興工太守理郡嚴明夙夜匪懈公餘卽  
詣學宮覈工役之勤惰凡几屋之□深小大短長之制蓋瓦  
級甃之宜皆親□指措規則一意圖爲經久之計乙酉七月  
□成復勸率好義之家出力起建兩廡餘□嘉惠茲學若理

家事實欲印副聖朝作新之盛學之士嘗請名筆已給大略  
然當時上下推誠效力不可不書故特書姓氏以示傳久文  
學據姚熙載書

京山廟學記

永見藏金  
手見藏金

夫子之道與天地相爲悠久自契元王敬敷五教於堯舜之  
世太乙成湯日新盛德微子象賢統承先王其所繇來固已  
遠矣吾夫子復以至聖之德垂範百王其廟貌之嚴享祀之  
盛宜其永世無窮也往當世見而知之者若顏曾閔冉以下  
七十二子羽翼聖道者至矣嗣而緝熙者則有子思孟子與  
大儒左邱明公羊高穀梁赤等或以傳道或以闡經以至於  
宋之九賢我朝之許先生總而爲從祀者百有五十自國學

以及鄧邑凡有廟貌者皆列祀之京山在漢爲新市李唐始爲縣以隸郢縣故有廟學而兩廡從祀闕至元丁丑始於荆門州學得畫像縣尹賈侯泰享至以爲畫不莊不稱瞻仰乃命工改塑像而廊廡狹隘弗克盡容至正五年春縣尹沈邱泰侯伯顏不花下車之初首與教諭周德孫義出學廩及率邑之義士廣西廡四楹增塑左邱明以下三十二位而主簿廣平郝君執禮縣尉張敦復典史王宏克贊襄之經始於至正六年三月落成於明年四月而後從祀之數與他郡邑等按禮有春秋釋奠於先師開元更定始以吾夫子爲先聖以顏子配從祀之位代有所增則百世之下得從祀者安知其止於今日而已哉先聖之位吾知其終古而不易矣說者謂堯舜孔子俱大聖人而夫子獨得廟祀曾不知方堯舜盛時

賢臣滿朝而契獨敷教吾夫子實元王之裔則天之生聖人固不偶然矣庸人俗吏視學校教化爲緩政而不知天敘天秩不可一日之不敘世道衰微則三綱淪而九法斁政之大者莫重於此今縣尹秦侯獨能以教化爲先務教諭周德孫義能以學校爲己任可謂知所本矣主簿郝君自上都學官三轉而佐是邑故凡贊其事以成厥美又孰非詩書之澤濡染之化哉茲用刻諸堅珉以俟來哲至正丁亥孟夏記

京山廟學記國子助教陶鑄撰至正七年在京山縣學

石  
序侯考

### 興國州修學記

未見據金石  
序侯考錄入

興國在隋唐爲邑或名陽新或名富川或名永興至宋太平

興國三年升爲軍興姑孰分紀年之號以爲名皇元混一升  
軍爲路古屬江夏郡宋屬江西路今屬湖北道其壤介江湖  
之間有山水之勝其土饒金銀銅鐵之產故郡號富川而邑  
號大治其民銳於治生怯於私門故易爲政士篤於好學而  
恥於浮靡故可語道郡守之至於斯者樂其釐務之多暇則  
治其學政焉宋乾道中自邵西遷學今所嘉定中以公田易  
寺地爲池我朝至正三年癸未總管焦侯嘉議視禮殿駸駸  
敝撤而更新六年丙戌今總管石抹侯大中以兩廡應門卑  
陋弗稱禮殿之制乃命匠計工又召吏計學廩所儲登耗吏  
曰儉不足爲用於是集眾議酌事宜節浮費徵宿逋復故額  
吏云財足調度然後庀工掄材揀日興事命錄事張應元府  
吏葉應祥程思賢董其役以七年丁亥正月鳩工九年己丑

六月落成闢地立箇鼎石陶瓦壘址堅崇視舊加袤建東西  
廡十有四間奉安從祀像百有五人應門九間列棨戟二十  
有四戟又作東西齋八間以處來學按舊券歸寺所占泮池  
上作棧星門三內外計百有餘楹民不告勞工各獻技新殿  
巍巍門廡翼翼輪奐偉然一郡政觀春秋釋奠登歌作樂察  
有曄綏滯滯咸易其制克諧厥聲期月之間百廢具興教養  
兼至多士屬心是秋七月侯將受代諸生請於教授何玠奉  
事狀來澗山中謁予文以記予考邵志知歷代沿革由縣而  
軍由軍而路皆以其名物之阜故陸其名稱以重其付託也  
且郡以富名又非以土產之美有助於國用乎思昔周禮賦  
地官之職凡國家土地之圖人民之數與夫貢賦力役之等  
山林川澤之產至於邇人金玉錫石之地嚴其厲禁而搜求

所取之處其所以爲實國用者不旣周乎然其所掌莫大於  
邦教焉書君奭曰天惟純佑命則商實蓋言商之百姓王人  
罔不秉德以及小臣屏侯旬矧惟奔走茲惟德稱用又厥辟  
此天之所以實商也蓋國之虛實係乎人材之盛衰教化之  
隆替也其來久矣學校者人材之所自出教化之所由興也  
故以鄉三物興賢能而德行道藝之選由於學以本俗六安  
萬民而師儒朋友之聯繫於學頒學之制惟地官爲詳然則  
有民社者可不以學校爲先務乎今皇帝詔天下守令考課  
六事悉備爲最而興舉學校先之興國土產之美固足以裕  
國而人材顯庸於其鄉者若吳中復之骨鯁而時君錫之書  
號鐵御史教化之新徵於前代者若陸子壽之職教是邦士  
至今尊慕之號陸子學斯二美者視今富川土地之美其貴

重可同日語哉郡守作□教官興起士氣他日之效況未必止乎前日

興國州修學記歐陽元撰正書至正九年在興國州學石  
有依考

南漳臥龍山靈泉禪寺修造記

未見據金石存佚考錄入

國家初用兵襄樊南漳臥龍山靈泉寺廢天下既定其寺僧覺如歸自江陵之報恩寺修其牆屋復其田疇於是僧之散者稍稍復聚大德□年秋□禪寺沒其徒瑩禪師嗣乃建正殿四楹崇四尋有三尺廣五筵法堂六楹崇視殿而去一尋有三□廣去其筵有二尺藏殿四楹崇廣皆視其堂嗣五年而去爲僧判其徒昇禪師繼之自至治元年至後至元六年

建普堂殿四楹崇三尋有四尺廣四筵庫堂八楹崇視殿而去其一尋廣視其筵有二尺僧堂之楹及其崇廣皆視庫堂堂三門六楹崇二尋有二尺廣二筵有二尺環方丈諸室兩廡諸僧房及庖庾□外三門以間計凡百餘門之外礮石爲橋而屋其上曰伏龍之橋以聰禪師嘗□虎自隨也橋之外幾通道一里餘以□于市市卽古中廬縣治諸殿皆朱薨碧瓦諸像設皆端好妙麗諸鐘鼓器物皆精雅堅良凡所以致崇極於佛者無不盡蓋合六十五年之功而後備焉至正元年春介余從子沆請記按東晉時郗之白馬寺僧聰禪師過□山□心好之山有古井曰吾道若興於此井卽自湧井果三湧遂建寺居焉而井與清涼河通故世號清涼三湧遇旱而禱雨輒應故寺以之名名夫寺者□□以至於今凡歷代

十有四歷年千餘以宋末之兵當護焚之間而不入於煨燼  
復遭聖朝大興其教如瑩昇三老相繼作而新之一木一石  
不資於舊一錢一棹無待於人蔚然爲大叢林於當世此固  
出於其人亦寺之當興也然因其興而悖夫道戾夫行其可  
恃以爲久哉故賢者必於是而致憤焉昇禪師郡人屈氏子  
有道有德爲人所敬自延祐三年主寺事居廿有二年而  
讓於珉禪師今則珉主之也寺有不戒者尊者磨納袈裟及  
戒力乃宋末寺僧心禪師所得寺初有□□千畝稻地七十  
畝瑩禪師復出私錢買稻田二百五十畝以益之諸營造費  
皆出此不足又以私錢益之嗚呼後之尙毋忘前人之勤哉  
昇之徒曰提點惟欽監寺惟鎮珉之徒曰惟福同致詞請余  
文者其鄉之長老周才叔秦桂榮及弟桂發韓弁白鶴觀住

持齋文純也

南漳臥龍山靈泉禪寺修造記揭傒斯撰從子沆飛朱入

石至正九年十二月在南漳縣

金石存佚考

黃州路劉侯興學記

佚

黃州路總管劉侯興學記賜進士出身奉訓大夫荊門州

知州兼勸農事聶炳謨資善大夫淮西江北道肅政廉訪

使裴思謙篆額至正十一年十一月

金石存佚考

玉泉寺鐵釜

存正書陽文在當陽

玉泉禪寺至正辛卯四月日置

元釜一題玉泉禪寺至正辛卯四月日置十二字口內徑

五尺八寸深三尺二寸款在邊向上字頗端楷無書人姓

石湖北金

蕪州蕪春縣興學頌并序

蕪春縣人

蕪春縣長野仙普化君既新廟學郡學教授衛炎爲記君上計京師稍爲余言治邑之事君始至官修農桑水利之政平獄訟卹災傷無所不用其情其興學之績爲最大蓋蕪春之學在郡城東北之鮮原素無恆產儒之在籍者甘有八家多貧不能自振於是學舍傾圯絃誦寂寥君始至伏謁廟下大懼無以塞國家崇學右文之意乃出稟給爲之倡尹邊守誠丞孫克昭主簿蘇世榮教諭魯志暨胥吏富民咸相其役因其舊而修之者大成之殿明新之堂撤而新之者門廡齋舍

創成之者靈星大成二門若夫祀所龕室帳帟祭器無有不  
備學之間用悉以種桑歲集之以補贍學之費民知令之所  
向相勸從事於詩書而敦行孝弟君之於政知所先後如是  
乃爲之頌使刻之石其詞曰

我行江濱爰采其蘄田多汙萊戶有嘯呻天監下土哀此罷  
民畀我賢令惟皇之仁學校之行先王善政造我世皇著在  
甲令蘄春有學以祀先賢棟撓宇傾曷以廣訓賢令律至願  
瞻徘徊乃鳩羣工罔敢弗來祇奉明命僉言允諧有嚴俎豆  
民德孔懷雍雍童冠濟濟絃誦修行明經聯翩充貢繫此長  
才小試其川伐石刻辭輿人之頌

蘄州蘄春興學頌危素撰

金石存  
佚考

勝像寶塔四大字

佚

勝係寶塔四大字匾額字徑六寸首行題威順王太子建  
六字末行題大元至正四字在黃鶴樓前石牌坊上按元  
史列傳寬徹普化世祖之孫鎮南王脫歡子也泰定三年  
封廣順王鎮武昌有子四報恩又接待奴佛家奴和尚報  
恩奴三人俱死徐壽輝之難和尚封義王今匾題太子而  
不著名未知孰爲威順王嫡子史傳及宗室世系表俱無  
明文

石詩注

金石志十四